

Monsieur,

J'ay eu commandement de Madamo de vous escrire, en faveur d'un nommé Corneille Libaert, lequel par ses amis, luy a fait représenter la misere en laquelle il se trouve, pour avoir esté, sans sujet desistué d'un estat de substitut du baillif de Delfflant, qu'il avoit cherement cchepté, & y avoit esté maintenu par Mess. Storm, de Zeventer successivement, & de Messieurs de la chambre des comptes, jusques à ce que cet estat de Baillif, ayant esté donné a Monsieur Vanderhove, qui luy auroit permis de continuer son office de substitut l'espace de huit mois sans luy donner aucuns gages, il l'auroit finalement desmis, pour la donner a un autre, n'alléguant aucune cause que sa volonté, selon que le dit Libaert l'expose. Sur quoy se trouvant en un miserable estat, il supplie son excell. de luy octroyer de grace une expectative de la charge de baillif de Monster & Villages despendants, en cas que Dieu retire Monsieur Schoute qui la possède, & lequel depuis neuf mois est detenu au lieu, sans esperance de convalescence. Sur quoy il a pleu a ma dite dame me commander de vous représenter ce que dessus, & vous faire entendre, qu'autant que vous verriez, qu'il se pourra, vous aidiez ce pauvre homme en sa requeste, auquel on rend tesmoignage de probité & capacité requise en tel cas, & que vous feriez en cela chose qui luy sera agreable, pource qu'elle desire gratifier ceux qui le recommandent. Vous en jugerez donc selon vostre prudence, pour mesnager l'affaire comme vous verrez a propos. Quant a moy, je n'en suis que le rapporteur, mais je suis tousjours bien aise quand il se presente sujet de me ramenteroir en vostre souvenir, en attendant le bon heur de vous veoir, duquel j'espere que nous jouirons bien tost, puis que nous sommes sur le point de partir pour Arnhem. Je prie Dieu, que comme vous nous avez aujourd'huy donné de bonnes nouvelles, aussy nous vous puissions tous trouver en l'estat prospere que vous desire,

Monsieur,

De la Haye, le 4 Juillet  
Année. 1634

Hug. 37.

Vostre tres-humble & plus-affecté  
Serviteur, André Rivet.

1650  
1771





A Monsieur,

Monsieur de Guilcom  
Conseiller & Secrétaire  
d'Etat, de son Excellence.

Au Camp.

